

La Lettre Jèrriaise pour lé 29 du mais d'Juîn 2024

Bouônjour, bouonnes gens. Ch'est François L'Maistre tchi vous présente la Lettre Jèrriaise, aniet Sanm'di lé 29 du mais d'Juîn 2024.

Justement un p'tit mio pus qué dans tchînze jours dé temps, j'allons aver eune aut' Visite Rouoyale, mais chute fais, ch'est Lé Rouai dé l'Angliétère, Charles lé Traisième, lé preunmié Rouai à nous visiter pour eune volée, valet !! Véthe, pa'ce qué quand Lé Rouai George lé Sièxième mouothit en 1951, (i' nous avait visité aue la Reine auprès la dgèrre) ch'tait La Reine Élizabé la Deuxième tchi nous visitit deux'-trais fais aue s'n homme, lé Duc d'Edimbourg, duthant san règne dé pus dé septante ans.

Pouortchi chute visite, lé tchînze du mais Juillet est bein îportante? Pa'ce qué quand même qué Nouot' Duc nous a visité bein des fais l' temps pâssé, ch'tait comme lé Prince du Pays d'Galles toutes les aut' fais.

J'n'ai janmais ieu l'privilège ni l'pliaîsi dé rencontrer nouot' Duc pèrsonnellement, mais, quand j'tais à la Fèrme des États à la Trinn'té, la Reine Élizabé et s'n homme, Lé Duc, visitîent l'île dé Jèrri en 1989. Les cheins tchi prépathîent lé programme pour lus visite décidîent d'aver eune exhibition des difféthents mêtchièrs dé l'île dans deux grand' tentes en d'avant des bâtisses dé la Fèrme des États. L'idée 'tait d' montrer à lus Majestés chein qué Jèrri faithait duthant toute l'année pour faite vaie les belles choses qué certains dé nous artistes, campagnards, fèrmièrs et d'autres pouvaient faite.

Bein seux, ils arrangîent pour un tas dé p'tchiots dé difféthentes êcoles dé v'nîn pour parader sus l'hèrbe à côté des tentes et pour d'autres grand's gens à être là étout pour être întroduits à La Reine et Lé Duc d'Edimbourg quand i' s'en allaient faite lus promenade.

Eh bein, i' fallait trouver deux pèrsonnes pour condithe Lus Majestés alentou des tentes et pour faite les întroductions si La Reine ou Lé Duc voulaient pâler ès cheins tchi 'taient enchèrgis dé souongni des exhibitions ou s'i' voulaient d's explycâtions entour tchiquechose sus lus halle. Nou-m'dit qué ch'tait mé et iun d'mes collègues, Tim, tchi s'en allaient aver la responsabilité dé souongni d' La Reine et du Duc duthant la visite dé l'exhibition. Mais acouo pus qu'chonna, ma femme June et la femme à Tim fûtent les deux învitées dé nous jouaindre dans la parade d'avant lé tour dé l'exhibition pour être présentées à La Reine et L'Duc et pis faite lé tou ensembl'ye, Tim et sa danme dans eune tente aue la Reine et mé et June aue lé Duc dans l'aut' tente.

Né v'la lé grand jour arrivé, June avait acaté eune nouvelle robe pour chute spéciale occâsion et j'tais dans man bouan fa d'habit du dînmanche ! Lé chef dé l'administrâtion du Département et sa danme fûtent întroduits à lus Majestés et pis ch'tait nouot' tou dé faite un salut et faite eune révéthence à La Reine et l'Duc et pis être întroduits comme officiers du Département.

Tim et sa danme accompagnîent la Reine lé tou dé ieune des tentes, et June et mé, j'accompagnîmes Lé Duc lé tou d'la deuxième tente. Lé Duc fut êprîns par lé travail d'un chef dé ieune des hôtels, tch'avait fait un magnifique dessin aue des fis d'chucre. Lé chef dit au Duc tch'il avait travaillé toute la niet pour faite chute superbe étalée, et Lé Duc sé touônînit d'côté et s'dit, tchi pèrte dé temps !

J'crais qu' Lé Duc 'tait un p'tit mio malheureux pa'ce qu'il avait 'té s'pathé d'la Reine et i' continuait à rouspéter tout l'temps tchi fut dans la tente, mais i' tait bein pus heûtheux quand i' dêhalit d'la tente et put èrjoindre La Reine pour continuer lus tour.

Mais, comme d'habitude, j'continue à bagouler quand j'dév'thais arrêter. N'en v'la assez pour aniet. Mèrcie pour m'aver êcouté. Ayiz tous eune bouanne semaine.
À bi.